

摘藻堂四庫全書薈要

集部

欽定四庫全書薈要

集部

御定詠物詩選卷二百

三十九至  
四十一

詳校官原任主事臣李斯咏

欽定四庫全書薈要卷一萬八千八百六十一

集部

御定佩文齋詠物詩選卷二百三十九

道士類

五言古

貽韋鍊師

唐

儲光義

精思莫知日意靜如空虛三鳥自來去九光遙卷舒新  
池近天井玉宇停雲車余亦苦山路洗心祈道書

越中逢天台太乙子

唐

孟浩然

仙穴逢羽人停艫向前拜問余涉風水何處遠行邁登  
陸尋天台順流下吳會茲山夙所尚安得聞靈怪上逼  
青天高俯臨滄海大鷄鳴見日出常覲仙人旆往來赤  
城中逍遙白雲外莓苔異人間瀑布當空界福庭長自  
然華頂舊稱最永此從之遊何當濟所屈

與王昌齡宴黃道士房

孟浩然

歸來卧青山常夢遊清都漆園有傲吏惠好在招呼書  
幌神仙錄畫屏山海圖酌霞復對此宛似入蓬壺



題盧道士房

唐李頎

秋砧響落木共坐茅君家惟見兩童子林前汲井華空  
壇靜白日神鼎飛丹砂麈尾拂霜草金鈴搖霽霞上章  
人世隔看奕桐陰斜稽首開仙要黃精堪餌花

寄金椒山中道士

唐韋應物

今朝郡齋冷忽念山中客澗底束荆薪歸來煮白石欲  
持一樽酒遠慰風雨夕落葉滿空山何處尋行跡

尋華山雲臺觀道士

唐錢起

秋日西山明勝趣引孤策桃源數曲盡洞口兩岸圻還  
從罔象來忽得仙靈宅霓裳誰之子霞酌能止客殘陽  
在翠微攜手更登歷林行拂煙雨谿望亂金碧飛鳥下  
天窗裊松際雲壁少尋玄蹤遠宛入寥天寂願言葛仙  
翁終年煉玉液

山中訪道者

唐  
于鵠

觸煙入谿口岸岸惟檉櫟其中盡碧流十里不通屐出  
林山始轉絕徑緣峭壁把藤借行勢側足憑石脉頗牙

斷行處光滑猿猴跡忽然風景異乃到神仙宅天晴茅  
屋頭殘雲蒸氣白隔窗梳髮聲久立聞吹笛抱琴出門  
來不顧人間客山院不灑掃四時自虛寂落葉埋長松  
出地纔數尺曾讀上清經知注長生籍願示不老方何  
山有瓊液

送蕭鍊師入四明山

唐  
孟郊

閒於獨鶴心大於高松年迴出萬物表高樓四明巔千  
尋直裂峯百尺倒瀉泉絳雪為我飯白雲為我田靜言

不語俗靈蹤時步天

送李尊師元

孟郊

口誦碧簡文身是青霞君頭冠兩片月肩披一條雲松  
骨輕自飛鶴心高不羣

送道士

孟郊

千年山上行山上無遺蹤一日人間遊六合人皆逢自  
有意中侶白雲徒相從

別尹鍊師

唐  
李羣玉

吾家五千言至道懸日月若非函關令誰註流沙說多  
君飛昇志機悟獨超拔學道玉笥山燒丹白雲穴南窮  
衡疑秀採藥歷幽絕夜卧瀑布風朝行碧巖雪洞宮四  
百日玉籍恣探閱徒以菌蟪姿緬攀修真訣塵籠罩浮  
世遐志空飛越一罷棊酒歡離情滿寥泝願騎紫蓋鶴  
早向黃金闕城市不可留塵埃穢仙骨

山中道者

唐  
蘇拯

筇杖六尺許坐石流泉所舉頭看古松似對仙鶴語是

時天氣清四迴無塵侶顧我笑相迎知有丹砂異

寄鄧道士

宋蘇軾

一杯羅浮春遠餉採薇客遙知獨酌罷醉卧松下石幽人不可見清嘯聞月夕聊戲庵中人空飛本無迹

送許尊師還大滌洞

明張羽

青山九鎖處白髮一龕居清齋誦黃老不閱世間書餐霞食真氣對月禮空虛暫來流水地應與孤雲疎遙知還山日仙壇春草餘

寄琪林黃道士

明孫蕢

雨絕天景佳前榮樹光綠遙憐采芝侶遠在春山曲琴歌久已斷酒賦何由續有約今夕同開樽掃茅屋

七言古 附長短句

望龍山懷道士許法稜

唐劉長卿

心惆悵望龍山雲之際鳥獨還懸崖絕壁幾千丈綠蘿  
嫋嫋不可攀龍山高誰能踐靈原中蒼翠晚嵐煙瀑水  
如向人終日迢迢空在眼中有一人披霓裳誦經山頂

餐瓊漿空林閒坐獨焚香真官列侍儼成行朝入青霄  
禮玉堂夜掃白雲眠石牀桃花洞裏居人滿桂樹山中  
住日長龍山高高遙相望

贈別華陰道士

唐  
韓翃

紫府先生舊同學腰垂彤管貯靈藥恥論方士小還丹  
好飲仙人太元酪芙蓉山頂玉池西一室平臨萬仞溪  
晝灑瑤臺五雲濕夜行金燭七星齊回身暫下青冥裏  
方外相尋有知己賣鮓市中何許人釣魚坐上誰家子



青青百草雲臺春煙駕霓裳白角巾露葉獨歸仙掌去  
迴風片雨謝時人

送戴真人歸越

元虞集

戴先生日飲五斗醉不得再飲一石不肯眠昨從桃源  
來兩袖攜風煙長安道上小兒女拍手攔道呼神仙馬  
如遊龍花如雨蹴蹋春秋作朝暮東方不作窗間戲上  
帝還令海邊去海邊玉虹夜不收貝宮珠闕皆蛟蚪芝  
田玉樹久相待天上老仙那肯留戴先生鑑湖之水三

千丈不可以鑑可以釀明朝亦脫錦袍去與汝酣歌釣  
船上

和韻三茆山呈張伯雨外史

元

薩都拉

碧桃花落蓬萊宮銀屏甲帳圍春風水簾卷水玉堂靜  
白露滴月銀牀空仙人夜酌九霞酒手握北斗傾尊中  
梧枝落影鳳凰語幽韻彷彿臨蒼穹伐毛洗髓天地老  
火鼎夜出芙蓉紅呼龍洞口種瑤草採藥忽遇松間童  
茅君自騎一虎去猶聞珂珮聲丁東武華山人三載別

綠袍赤杖蒼髯翁淮南江上復相見落日澹澹天無窮  
明朝稽首渡江去楚水清淺銀河通

御製山水圖歌賜長春真人劉淵然歸南京

明  
宣宗

東華之東湛明景彩霞環繞蓬萊境瓊枝瑤草春不窮  
丹光夜動黃金鼎淵然老仙崆峒客萬里歸來此棲息  
手持如意青芙蓉兩臉潮紅頭雪白頭上玉琢冠身中  
雲繡衣朝朝飛神馭烝超汗漫直上太清朝紫微腰間

騰龍雙寶劍秋水光晶寒激灩嘯風呼霆作霖雨屢注  
仙瓢蘇下土功成斂用歸希夷玄天至道本無為眼看  
民患忍坐視恤人亦體天之慈旦來謝別何怱怱騎鶴  
徑度江之東江東龍盤虎踞五雲表鍾山翠接三茅峯  
茅家兄弟青冥上白日驂鸞定相訪還來赤松子亦有  
安期生上朝南極壽昌星好山好水清且明西方出金  
桃南斗斟雲液長生有曲舞且歌年過廣成千二百

贈丘老師

明  
高 啟

長春之孫自仙骨袖有蟠桃食遺核平生不學燒汞方  
唾視黃金等何物滿城誰識舊庚桑白髮人中似鶴長  
時上高樓惟獨醉榴皮書破壁塵香

洞虛道院訪鶴山道士

明王問

洞虛清寒十二時絳樓簾幕鎮長垂庭中槭槭卷風葉  
玉露凋落青梧枝身騎飛龍逐流電聞君受法通明殿  
萬里雲霄鶴一聲夜靜歸來月如練

五言律

寄天台司馬道士

唐崔湜

聞有三元客，析仙九轉成。  
人間白雲返，天上赤龍迎。  
尚惜金芝晚，仍攀琪樹榮。  
何年緱嶺上，一謝洛陽城。

寄天台司馬道士

唐張說

世上求真客，天台去不還。  
傳聞有仙要，夢寐在茲山。  
朱闕青霞斷，瑤堂紫月閒。  
何時枉飛鶴，笙吹接人閒。  
奉饒高尊師，如貴道士傳。  
道錄畢歸北海。

唐李白

道隱不可見靈書藏洞天吾師四萬劫歷世遞相傳別  
杖留青竹行歌躡紫煙離心無遠近長在玉京懸

尋洪尊師不遇

唐  
劉長卿

古木無人地來尋羽客家道書堆玉案仙帔疊青霞鶴  
老難知歲梅寒未作花山中不相見何處化丹砂

尋南谿常道士

劉長卿

一路經行處莓苔見屐痕白雲依靜渚青草閉閒門過  
雨看松色隨山到水源谿花與禪意相對亦忘言

尋賈尊師

唐 盧 綸

玉洞秦時客焚香暎綠蘿  
新傳左慈訣曾與右軍鵞  
井白陰苔遍方書古字多  
成都今日雨曾與酒相和

贈月谿羽士

唐 戴叔倫

月明谿水上誰識步虛聲  
夜靜金波冷風微玉練平  
自知塵夢遠一洗道心清  
更弄瑤笙罷秋空鶴又鳴

贈道者

唐 朱慶餘

獨住神仙境門當瀑布開  
地多臨水石行不惹塵埃  
風



起松花落琴鳴鶴翅迴還歸九霄上時有故人來

山中道士

唐賈島

頭髮梳千下休糧帶瘦容養雛成大鶴種子作高松白石通宵煮寒泉盡日春不曾離隱處那得世人逢

靈都觀李道士

唐張籍

山觀雨來靜遶房瓊草春素書天上字花洞古時人泥竈煮靈液掃壇朝玉真幾迴遊閬苑青節自隨身

贈王道士

唐于鵠

去尋常不出門似絕人行牀下石苔滿屋頭秋草生學  
琴寒月短寫易晚窗明惟到黃昏後谿中聞磬聲

送秦鍊師

唐  
李羣玉

紫府靜沈沈松軒思別吟水流寧有意雲汎本無心錦  
洞桃花遠青山竹葉深不因時賣藥何路更相尋

送王道士

唐  
馬戴

真人俄整舄雙鶴屢飛翔恐入壺中住須傳肘後方霓  
裳雲氣潤石徑朮苗香一去何時見仙家日月長

送道友入天台山作

馬戴

却憶天台去移居海島空  
觀寒琪樹碧雪淺石橋通  
漱齒飛泉外餐霞早境中  
終期赤城裏披覽與君同

贈王尊師

唐  
劉得仁

為道常日損尊師修此心  
挂肩黃布被穿髮白蒿簪  
符札靈砂字絃彈古素琴  
囊中常有藥點土亦成金

贈道者

唐  
唐球

披霞帶鹿胎歲月不能催  
飯把琪花煮衣將藕葉裁  
鶴

從歸日養松是小時  
裁往往樵人見谿邊洗藥來

逢道者神和子

唐王穀

珍重神和子  
聞名五十年  
童顏終不改  
綠髮尚依然  
酒裏消閒日  
人間作散仙  
長生如可慕  
相逐隱林泉

贈聶尊師

唐杜荀鶴

詩道皆仙分  
求之不可求  
非關從小學  
應是數生修  
蟾桂雲梯折  
鰲山鶴駕遊  
他年兩成事  
堪喜是鄰州

送喻鍊師歸茅山

唐李建勳

休糧知幾載，臉色似桃紅。  
半醉離塵去，單衣行雪中。  
水聲茅洞曉，雲影石房空。  
莫學秦時客，音書便不通。

遇道者

唐張翊

數里白雲峯，身輕無履蹤。  
故尋多不見，偶到即相逢。  
古井生靈水，高壇出異松。  
聊看杏花酌，便似換顏容。

山寺喜道者至

唐僧貫休

閏年春過後，山寺始花開。  
還有無心者，閒尋此境來。  
鳥幽聲忽斷，茶好味重回。  
知住南巖久，冥心坐綠苔。

宿休菴用德功壁間韻贈陳道人

宋  
朱子

暮入千峯裏寒棲一草庵室連丹竈煖厨引石泉甘塵  
慮紛難到神光暖内含非君有道氣孤絕詎能堪

送倪道士之廬山

宋  
趙師秀

近方辭地肺本自住天台有鶴相同出無雲作伴回道  
房隨處借詩板逐時開又說廬山去閒看瀑布來

贈熊鍊師

宋  
翁卷

松邊自掩扉賣藥罷方歸教客認仙草笑人求紫衣惜  
琴眠處放翫易語時稀見說沅砂賤閒身去欲飛

修真院訪崔道士

宋

真山民

竹扉蒼蘚牆林下小丹房風定香煙直月斜簾影長淪  
茶泉味別點易露痕香安得棲塵外求師却老方

初夏訪劉道士

真山民

白雲隨杖履伴我到山房暑薄疑天別林深見路長木  
芝皆道味花竹亦詩香更待荷花後來分半榻涼

贈楊洞天道人

元 馬祖常

我自不入俗君今又欲仙  
鳥啼百花裏屋住萬山邊  
密樹雲難過空潭月易圓  
題詩秋卷了為說小行年

寄題汪道士草亭

元 虞 集

飛白妙娉婷新題照草亭  
仙遺相鶴法客借換鶯經霧  
雨歸懸黍風雲護茯苓  
遙知春晝永深坐養黃庭

寄王道士宗晉

元 倪 瓚

王君舊隱地聞更結茅茨  
鶴氅春裁苧鶯群雪汎池  
時



歌綠水曲不負碧山期  
夜雨生芳草令人起夢思

懷王道士

明  
袁凱

宣城王道士愛著芰荷衣  
一自清江別三年白雁飛  
酒徒隨處有沽客向來稀  
寢憶青城夜狂歌不肯歸

送呂道士

明  
張羽

石室無人住歸心似鶴輕  
山君驅虎去童子報丹成  
玉竇憑龍守芝田借雨耕  
懷君明月夜遙聽步虛聲

寄方壺道人

明  
詹同

海上神仙館天邊處士星卧雲歌酒德對雨著茶經石  
洞龍噓氣松巢鶴墜翎都將金玉句一一寫空青

五言排律

贈焦道士

唐王維

海上遊三島淮南預八公坐知千里外跳向一壺中縮  
地朝珠闕行天使玉童飲人聊割酒送客乍分風天老  
能行氣吾師不養空謝君徒雀躍無可問鴻濛

贈東嶽焦鍊師

王維

先生千歲餘五嶽遍曾居遙識齊侯鼎新過王母廬不  
能師孔墨何事問長沮玉管時來鳳銅盤即釣魚聳身  
空裏語明目夜中書自有還丹術時論太素初頻蒙露  
版詔時降軟輪車山靜泉逾響松高枝轉疎搢頤問樵  
客世上復何如

逢牛尊師

明林鴻

道逢牛道士把酒醉雲房龍問壺中訣人傳肘後方久  
知鳧是鳥更指石為羊遣興聊題翰無言但括囊秋星

明劍氣夜月讓丹光  
酣飲從傾倒神遊極  
混茫別情波渺渺歸  
路樹蒼蒼又櫂扁舟  
去尋雲到草堂

七言律

送方尊師歸嵩山

唐王維

仙官欲住九龍潭  
旌節朱轡倚石龕  
山壓天中半天上  
洞穿江底出江南  
瀑布松杉常帶雨  
夕陽彩翠忽成嵐  
借問迎來雙白鶴  
已曾衡嶽送蘇耽

送張道士歸茅山謁李尊師

唐皇甫冉

向山獨有一人行近洞應逢雙鶴迎常以素書傳弟子  
還因白石號先生無窮杏樹何年種幾許芝田帶月耕  
師事少君年歲久欲隨旄節往層城

題嵩陽焦道士石壁

唐 錢起

三峯花畔碧堂懸錦里真人此得仙玉體纔飛西蜀雨  
霓裳欲向大羅仙綵雲不散燒丹竈白鹿時藏種玉田  
幸入桃源因出世方期丹訣一延年

贈韓道士

唐 戴叔倫

日暮秋風吹野花上清歸客意無涯  
桃源寂寂煙霞閉天路悠悠星漢斜  
還似世人生白髮定知僊骨變黃芽  
東城南陌頻相見應是壺中別有家

贈道士

唐

李端

姓氏不書高士傳  
身材自得逸人風  
已傳花洞將秦接  
更指茅山與蜀通  
嬾說歲年齊絳老  
甘為鄉曲號涪翁  
終朝賣藥無人識  
敝服徒行入市中

贈東嶽張鍊師

唐

劉禹錫

東嶽真人張鍊師高情雅淡世閒稀堪為列女書青簡  
久事元君住翠微金縷機中拋錦字玉清潭上著霓衣  
雲衢不要吹簫伴只擬乘鸞獨自飛

送胡鍊師歸王屋

唐張籍

王陽峯下學長生洞府仙鄉已有名獨戴熊鬚冠暫出  
惟將鶴尾扇同行煉成雲母休炊爨召得雷公當吏兵  
却到瑤壇上頭宿應聞空裏步虛聲

尋郭道士不遇

唐白居易

郡中乞假來相訪洞裏朝元去不逢看院祇留雙白鶴  
入門惟見一青松藥爐有火丹應伏雲碓無人水自舂  
欲問參同契中事更期何日得相從

尋趙尊師不遇

唐姚鵠

羽客朝元晝掩扉林中一徑雪中微松陰遶院鶴相對  
山色滿樓人未歸盡日獨思風馭返寥天幾望野雲飛  
憑高目斷無消息自醉自吟愁落暉

贈道者

唐劉威



五雲深處有真仙  
歲月催多却少年  
入郭不知今世事  
賣丹猶覓古時錢  
閒尋白鹿眠瑤草  
暗摘紅桃去洞天  
時向人間深夜坐  
鬼神長在藥囊邊

贈道者

唐  
劉滄

真趣淡然居物外  
忘機多是隱天台  
停燈深夜看仙錄  
拂石高秋坐釣臺  
賣藥故人湘水別  
入簷棲鳥舊山來  
無因朝市知名姓  
地僻衡門對嶽開

贈道士

唐  
褚載

簪星曳月下蓬壺曾見東臯種白榆六甲威靈藏瑞檢  
五龍雷電遶霜都惟教鶴探丹丘信不使人窺太乙爐  
聞說葛陂風浪惡許騎青鹿從行無

華山李鍊師所居

唐皮日休

麻姑古貌上仙才謫向蓮峯管玉臺瑞氣染衣金液啓  
香煙暎面紫文開孤雲盡日方離洞雙鶴移時只有苔  
深夜寂寥存想歇月天時下草堂來

送羽人王錫歸羅浮

唐曹唐

風前整頓紫荷巾  
常向羅浮保養神  
石磴倚天行帶月  
鐵橋通海入無塵  
龍蛇出洞閭邀雨  
犀象眠花不避人  
最愛葛洪尋藥處  
露苗煙藥滿山春

贈道人

唐  
曹松

住山因以福為庭  
便向山中隱姓名  
闔苑駕將雕羽去  
洞天贏得綠毛生  
日邊腸胃餐霞火  
月裏肌膚飲露英  
顧我從來斷浮濁  
擬驅雞犬上三清

龍潭張道者

唐  
伍喬

碧洞幽巖獨息心時人何路得相尋養生不說憑諸藥  
適意惟聞在一琴石徑掃稀山蘚合竹軒開晚野雲深  
他年功就期飛去應笑吾徒多苦吟

貽廬山清谿觀王尊師

唐

李中

霞帔星冠復杖藜積年修鍊住靈溪松軒睡覺冷雲起  
石磴坐來春日西採藥每尋巖徑遠彈琴常到月輪低  
鼎中龍虎功成後海上三山去不迷

贈王道者

李中

混俗從教鬢似銀  
世人無分得相親  
槎流海上波濤闊  
酒滿壺中天地春  
功就不看丹竈火  
性閒時拂玉琴塵  
仙家變化誰能測  
只恐洪崖是此身

贈鍾尊師遊茅山

李中

筇杖擔琴背俗塵  
路尋茅嶺有誰羣  
仙翁物外應相遇  
靈藥壺中必許分  
香入肌膚花洞酒  
冷侵魂夢石牀雲  
伊余亦有朝修志  
異日遨遊願見君

寄西華黃鍊師

唐

羅隱

西華有路入中華依約山川認永嘉羽客昔時留篠簜  
故人今又種煙霞壇高已降三清鶴海近因通八月槎  
盛事兩般君總得老萊衣服戴顓家

贈奚道士

宋 徐鉉

奚生曾有洞天期猶傍天壇摘紫芝處世自能心混沌  
全真誰見德支離玉霄壁閉人長在金鼎功成俗未知  
他日飈輪謁茅許願同雞犬去相隨

寄茅山溫尊師

宋 趙師秀

幾度題詩寄入山不知何處得書看  
莓苔石上秋吟苦  
星斗壇中夜拜寒  
鶴改新名呼未至  
碑逢斷刻打應難  
憶師每欲尋師去  
芝朮栽成自可餐

贈玉隆劉道士

宋

劉克莊

觀中曾訪老黃冠  
爾尚為童立醮壇  
新染氅衣披得稱  
舊泥丹竈出來寒  
詩非易作須勤讀  
琴亦難精莫廢彈  
憶上洪崖題瀑布  
因遊試為拂塵看

送戴道士住天台

元

程鉅夫

君承恩命住天台萬壑千峯繞絳臺門外霞川浮溟滓  
杯中雲海接蓬萊時同野鶴看桃去或領山猿採藥迴  
三十年前吾亦到舊題應入白雲堆

訪李真人不遇

元虞集

退朝花底珮珊珊去訪真人曉出關芳草欲迷行徑古  
長松深護步廊閑蒼龍挾雨探瑤簡白鹿穿雲致玉環  
如到天壇看月影定知清露滿人間

送薛玄卿歸龍虎山

元楊載



金門詔下羽人歸，欲向山中採薺薇。  
琥珀懸崖松樹老，琅玕倚澗竹根稀。  
高巖蓄雨星辰濕，古石懸雲徑路微。  
養性可無軒冕累，遊塵元不染仙衣。

送王真人北上代劉宗師

元薩都拉

玉佩丁東下界聞，天風吹動碧霞裙。  
劉郎跨鶴遊三島，王子吹笙到五雲。  
洞府夜光傳玉印，石壇月黑禮茅君。  
若逢天上吳夫子，應問丹砂煉幾分。

送上清道士李士賓歸山

元張翥

歸去青谿點易窗仙林如子世難雙丹藏虎豹千山雪  
劍度魚龍萬里江別洞苔花分石路古壇松子落巖淙  
道人不用尋煙火術煎經冬正滿缸

贈天台李鍊師

元

貢師泰

翠蛟青鳳下晴空家住天台第幾重歲久松肪成琥珀  
夜深丹氣出芙蓉仙童奏簡騎文虎太乙懸旗起絳龍  
昨夜從師到天上故山還著白雲封

贈仙居散人

貢師泰

青山四面玉嵯峨中有山人隱薜蘿  
細雨閒門芳草滿微風深澗落花多  
童窺丹竈時驚鶴客寫黃庭欲換鵝  
我亦平生愛踈散春來應許謝朝珂

送袁道士

元

王士熙

軒轅雲裔越公家學道青山幾歲華  
仙覓安期曾授棗詩成湘子解開花  
金砂擬煉長生藥銀海初回遠使槎  
二十四巖明月夜簫聲何處落煙霞

送趙虛一降香至南海廬山會稽

元  
薛漢

天香分下殿西頭處士今乘使者騶曾是騎麟參北斗  
真成跨鶴過揚州山中五老應相識海上三神亦易求  
勾越東南仙柱觀神光依舊貫林丘

贈松崖道士

元  
周權

名山歷遍氣飄浮面帶風霜雪滿頭碧澗寒通丹井曙  
青松影落石潭秋布袍洗藥香猶濕砂釜藏茶火自留  
笑問閭風何處是追遊還許借青牛

別章鍊師

元倪瓚

方舟共濟春江闊  
訪我寒煙菰葦中  
鼓枕斜衝蘋葉雨  
鉤簾半怯杏花風  
仙人壇上芝應碧  
玉女窗中桃未紅  
擬趁輕帆數來往  
縹壺不惜酒如空

寄贈皇屋壇劉鍊師

元郭鈺

神仙宮館近青冥  
紫翠峯巒開畫屏  
日射水晶江石白  
雲封琥珀嶺松青  
虎司丹鼎知留訣  
鶴立瑤壇聽說經  
相約安期今夕至  
靈風遙想滿虛櫺

壇下溪中出  
白石如水晶

送秦東海法師遊上清

明王翬

為愛仙山絕世氛，蒼苔寂寞路難分。  
白羊歲久渾疑石，瓊樹春深半是雲。  
洗藥泉香龍蛻骨，吹簫臺迥鶴成羣。  
隱文秘訣無人識，我欲相從一問君。

送趙一陽真士歸雲上

明周砥

渺渺晴湖白鷺飛，青山迢遞夕嵐微。  
閒操桂楫雲生腋，欲采芙蓉露滿衣。  
紫翠房深丹竈暖，松杉秋靜鶴巢稀。  
明年去覓封君達，應駕青牛說息機。

過龍虎山

明 甘瑾

素書一束展經綸世業留侯異等倫  
紫府羣仙天上籍碧桃流水洞中春  
吹簫嬴女臺留鳳送酒麻姑脯劈麟  
看取步虛朝帝所夜闌飛佩近星辰

贈鶴林周元初尊師

明 孫蕢

物外逍遙月鼎翁先生早歲得相從  
榴皮畫壁成黃鶴竹葉書符化綠龍  
天女時聞蒼水佩世人空拜藥珠峯  
神遊倘遂煙霞約便解朝衣問赤松

寄張心湛天師

明 王穉登

青鳥音書久寂寥，霓旌去入鳳城遙。  
身披一品麟衣坐，手捧三公象簡朝。  
長樂花深容曳履，未央月出許吹簫。  
不須更上蓬萊頌，清靜無為祝帝堯。

七言排律

贈竺鍊師

元 宋 元

姓疑乾竺古先生，霞外幽棲近四明。  
履斗星移冠劍影，步虛風引珮環聲。  
藥宮夜喚青鸞降，花洞朝騎白鹿行。



長使芝童看藥竈為耽瓊液過蓬瀛鶴傳仙語歸華表  
魚寄丹書上赤城怪石醉中拈筆畫險碁靜裏按圖爭  
玉桃竊慣慵留種瑤草尋多盡識名縮地日攜龍作杖  
卧雲時約鳳吹笙海邊定與安期遇關上當逢尹喜迎  
我本翠寒山道士相隨便欲採黃精

五言絕句

訪武陵道者不遇

唐

薛瑩

花發鳥仍啼行行路欲迷二真無問處虛度武陵溪

贈道者

唐馬戴

深居白雲穴靜註赤松經  
往往龍潭上焚香禮斗星

題道士青山白雲圖

明張以寧

仙館白雲封青山第幾重  
道人時化鶴巢向最高松

其二

行到谿源盡青山無俗氛  
道人拈鐵笛吹起滿川雲

其三

只道谿源盡遙聞鐘磬音  
却尋流水去行盡白雲深

七言絕句

送司馬道士遊天台

唐  
宋之問

羽客笙歌此地違  
離筵散處白雲飛  
蓬萊闕下長相憶  
桐柏山頭去不歸

河上歌

唐  
韓翃

河上老人坐古槎  
合丹只用青蓮花  
至今八十如四十  
口道滄溟是我家

寄許鍊師

唐  
戎昱

掃石焚香禮碧空  
露華偏濕藥珠宮  
如何說得天壇上  
萬里無雲月正中

贈成鍊師

唐  
劉言史

花冠藥帔色嬋娟  
一曲清簫凌紫煙  
不知今日重來意  
更住人間幾百年

尋徐道士

唐  
張籍

尋師遠到暉天觀  
竹院森森閉藥房  
聞入靜來經七日  
仙童簷下獨焚香

贈道士

張籍

茅山近別剡谿逢玉節青旄十二重  
自說年年上天去羅浮最近海邊峯

同張鍊師谿行

唐施肩吾

青谿道士紫霞巾洞裏仙家舊是鄰  
每見桃花逐流水無回不憶武陵人

員嶠先生

唐徐凝

員嶠先生無白髮海煙深處採青芝  
逢人借問陶唐主

欲進冰蠶五色絲

寄茅山孫鍊師

唐

李德裕

獨尋蘭渚翫遲暉  
閒倚松窗望翠微  
遙想春山明月曉  
玉壇清磬步虛歸

送張道者

唐

賈島

新歲抱琴何處去  
洛陽三十六峯西  
生來未識山人面  
不得一聽烏夜啼

贈朱道靈

唐

杜牧

劉根丹篆三千字  
郭璞青囊兩卷書  
牛渚磯南謝山北  
白雲深處有巖居

訪劉君

唐  
裴夷直

擾擾馳蹄又走輪  
五更飛盡九衢塵  
靈芝老觀深松院  
還有齋時未起人

贈張鍊師

唐  
溫庭筠

丹谿藥盡變金骨  
清洛月寒吹玉笙  
他日隱居無訪處  
碧桃花發水縱橫

高道士

唐  
陸龜蒙

我媚道士風骨峻手把玉皇書一通東遊借得琴高鯉  
騎入蓬萊清淺中

送道者

唐  
司空圖

洞天真侶昔曾逢西岳今居第幾峯峯頂他時教我認  
相招須把碧芙蓉

其二

殷勤不為學燒金道侶惟應識此心雪裏千山訪君易



微微鹿跡入深林

贈孫仁本尊師

唐韓偓

齒如冰雪髮如鬢  
幾百年來醉似泥  
不共世人爭得失  
卧床前有上天梯

送虞道士

唐李中

煙霞聚散通三島  
星斗分明在一壺  
笑說餘杭沽酒去  
蔡家重要會麻姑

訪洞神宮邵道者不遇

李中

閒來仙觀問希夷  
雲滿星壇水滿池  
羽客不知何處去  
洞前花落立多時

招西洞道者

唐

李昭象

危峯抹黛夾晴川  
樹簇紅英草碧煙  
樵客雲僧兩無事  
此中堪去覓靈仙

尋易尊師不遇

唐

陳嶰

爛熳紅霞光照衣  
苔封白石路微微  
華陽洞裏人何在  
落盡松花不見歸

寄清谿道者

唐僧齊已

萬重千疊紅霞嶂  
夜燭朝香白石龕  
常寄谿窗凭危檻  
看經影落古龍潭

送魏道士

宋張詠

江上蕭蕭木葉飛  
天台狂客杖藜歸  
莫嫌俗吏勤相顧  
曾是嵩陽舊掩扉

山中道士

宋謝翱

山中道士服朝霞  
二十修行別故家  
留客一杯清苦蜜

蜂房知是近梅花

留贈丹陽王鍊師

金元好問

敝盡貂裘白髮新  
京華旅食記前身  
仙翁相見休相笑  
同是邯鄲枕上人

訪劉道士

元朱德潤

雲林深處翠微多  
石室春深長薜蘿  
當代衣冠正高貴  
不須閒誦采薇歌

訪道士

明廖孔說

露草煙林斷客行竹扉晝掩對高城道人  
不愛人天供  
消受秋空鶴一聲

御定佩文齋詠物詩選卷二百三十九

欽定四庫全書薈要卷一萬八千八百六十二

集部

御定佩文齋詠物詩選卷二百四十

步虛詞類

五言古

道士步虛詞

北周

庾信

凝真天地表絕想寂寥前有象猶虛豁忘形本自然開  
經壬子歲值道甲申年迴雲隨舞曲流水逐歌絃石髓  
香如飯芝房脆似蓮停鸞譙瑤水歸路上鴻天

其二

東明九芝蓋北燭五雲車飄颻入倒景出沒上煙霞春  
泉下玉雷青鳥向金華漢帝看桃核齊侯問棗花上元  
應送酒來向蔡經家

其三

歸心遊太極迴向入無名五香芬紫府千燈照赤城鳳  
林採珠實龍山種玉榮夏簫三舌響春鐘九乳鳴絳河  
應遠別黃鵠來相迎



五言律

步虛詞

唐  
顧况

迴步遊三洞，清心禮七真。  
飛符超羽翼，焚火醮星辰。  
殘藥沾雞犬，靈香出鳳麟。  
壺中無窄處，願得一容身。

步虛詞

唐  
吳筠

紫府與玄洲，誰來物外遊。  
無煩騎白鹿，不用駕青牛。  
金化顏應駐，雲飛鬢不秋。  
仍聞碧海上，更用玉為樓。

其二

玉樹雜金花  
天河織女家  
月邀丹鳳鳥  
風送紫鸞車  
霧縠籠綃帶  
雲屏列錦霞  
瑤臺千萬里  
不覺往來賒

步虛詞

唐

韋渠牟

鸞鶴共徘徊  
仙官使者催  
香花三洞啟  
風雨百神來  
鳳篆文初定  
龍泥印已開  
何須生羽翼  
始得上瑤臺

其二

上帝求仙使  
真符取玉郎  
三才閤布象  
二景鬱生光  
騎吏排龍虎  
笙歌奏鳳凰  
天高人不見  
暗入白雲鄉

步虛詞

宋 徐鉉

氣為還元正心由抱一靈凝神歸罔象飛步入青冥整  
服乘三素旋網躡九星瓊章開後學稽首奉真經

五言排律

上元日聽太清宮步虛

唐 張仲素

仙客開金籙元辰會玉京靈歌賓紫府雅韻出層城聲  
雜音徐徹風飄響更清紆餘空外盡斷續聽中生舞鶴  
紛將集流雲駐未行誰知九陌上塵俗仰遺聲

七言律

步虛詞

明  
朱真澐

瑤壇深處磬聲微  
羽客朝元午夜歸  
杳杳三山青鳥過  
翩翩雙鳥彩鳬飛  
島間月色明珠樹  
洞裏丹光透玉扉  
劍佩幾回翔碧落  
天風吹冷六銖衣

其二

彩霞琪樹共氤氲  
七色斑虬駕鶴羣  
玉佩冷搖滄海月  
霓裳晴帶絳霄雲  
碧桃花綻春方永  
金鼎丹成火自焚

午夜朝元向天闕空歌聲在始清聞

七言絕句

步虛詞

唐

劉禹錫

阿母種桃雲海際  
花落子成二千歲  
滄海吹折最繁枝  
跪捧金盤獻天帝

蕭鍊師步虛詞十首卷後以二絕繼之

唐

白居易

欲上瀛洲臨別時  
贈君十首步虛詞  
天仙若愛應相問

向道江州司馬詩

其二

花紙瑤緘松墨字把將天上共誰開試呈王母如堪唱  
發遣雙成更取來

步虛詞

唐司空圖

阿母親教學步虛三元長遣下蓬壺雲韶韻俗停瑤瑟  
鸞鶴飛低拂寶鑪

步虛詞

唐高駢

清谿道士人不識  
上天下天鶴一隻  
洞門深鎖碧窗寒  
滴露研朱點周易

御定佩文齋詠物詩選卷二百四十



欽定四庫全書  
蒼要卷一萬八千八百六十三

集部

御定佩文齋詠物詩選卷二百四十一

道家雜類

四言古

洗藥池

晉

葛洪

洞陰泠泠風珮清清仙居永劫花木長榮

五言古

讀道書作

宋

朱子

巖居秉貞操所慕在玄虛清夜眠齋宇終朝觀道書形  
忘氣自冲性達理不餘於道雖未庶已超名迹拘至樂  
在襟懷山水非所娛寄語狂馳子營營竟焉如

其二

白露墜秋節碧陰生夕涼起步廣庭內仰見天蒼蒼東  
華綠髮翁授我不老方願言勤修學接景三元鄉

閔真誥

明  
張簡

長史昔好道鍊真三秀峯夜感紫微仙降集華房中鸞

鳥鳴素月翠旂颺琅風  
摛詞託諷諭贊揚皆真宗中有  
餐霞人可以回嬰童刻之白玉檢  
藏之華陽宮真人有  
仙氣乃得探其蹤  
我生慕元素無由啓愚蒙  
嘯詠金玉章  
靈音朗九空  
懷仙起冥想  
颺然精靈通  
焉能出囂滓  
歛忽驂雲龍

五言律

道家三首奉敕撰

唐張說

金壇啟曙闈  
真氣肅微微  
落月銜仙寶  
初霞拂羽衣  
香

隨龍節下雲逐鳳簫飛暫往蓬萊戲千年始一歸

其二

窈窕流精觀深沈紫翠庭金蓮調上藥寶案讀仙經作  
賦看神雨乘槎辨客星祗應謝人俗輕舉託雲輶

其三

道記開中錄真官表上清焚香三鳥至煉藥九仙成天  
上靈書下空中妙伎迎迎來出煙霧渺渺戲蓬瀛

贈辟穀者

唐

張籍

學得餐霞法逢人贈小還身輕會試鶴力弱未離山無  
食犬猶在不耕牛自閒朝朝空漱水叩齒草堂間

元日女道士受籙

唐賈島

元日更新夜齋身稱淨衣數星連斗出萬里斷雲飛霜  
下磬聲在月高壇影微立聽師語了左肘繫符歸

月下留丹竈

唐司空圖

月下留丹竈壇邊樹羽衣異香人不覺殘夜鶴分飛朝  
會初元盛蓬瀛舊侶稀瑤函真跡在妖魅敢揚威

七言律

題雍丘崔明府丹竈

唐李白

美人為政本忘機，服藥求仙事不違。  
葉縣已泥丹竈畢，瀛洲當伴赤松歸。  
先師有訣神將助，大聖無心火自飛。  
九轉但能生羽翼，雙鳧忽去定何依。

道服

宋王禹偁

楮符布褐皂紗巾，曾奉西垣寓直人。  
此際暫披因假日，如今長著見閑身。  
濯纓未識三湘水，漉酒空經六里春。

不為行香著朝服二車誰信舊詞臣

井西丹房

元張憲

葛井西頭更向西丹房高與白雲齊  
鉛田虎下飛紅電汞海龍沈結紫泥  
山鬼俯欄窺火候爐神伏地巧刀圭  
飲餘一醺中黃酒坐聽鶡聲松上啼

七言絕句

武陵龍興觀黃道士房間易因題

唐

王昌齡

齋心問易太陽宮八卦真形一氣中仙老言余鶴飛去  
玉清壇上雨濛濛

聞陳山人定命丹成試以詩乞

宋文同

水火相交養大還已聞神汞滿爐乾  
瓊肪穀漆尋常得教服靈丹二萬丸

煉丹井

元吳景奎


丹成遺井在層巔金碧靈光夜燭天  
抱甕道人閒不得



白雲深處灌芝田



御定佩文齋詠物詩選卷二百四十一



總校官庶吉士臣侍朝

校對官庶吉士臣嚴福

謄錄監生臣繆謨

欽定四庫全書薈要

集部

御定詠物詩選卷二百四十二

詳校官原任主事

臣李斯咏

欽定四庫全書薈要卷一萬八千八百六十四

集部

御定佩文齋詠物詩選卷二百四十二

食物總類

五言古

會食

宋

孔平仲

學宮不置酒相聚惟一飯公家事何多客至日已晚乘  
飢騁大嚼美惡寧復揀僕夫無所餘顧我色不滿潑茶  
旋煎湯就火自烘盞從容共談謔熟視笑而睨昌齡豈



其慍策馬獨先返

冬日放言

宋張耒

寒羊肉如膏江魚如切玉肥兔與奔鷄日夕懸庖屋嬉  
嬉顧妻孥滋味喉可欲謫官但強名比者何不足

園居荒蕪春至草生日尋野蔬以供匕筯今日

枯枿間得蒸菌四五亦取食之自笑窮甚戲

作此詩

宋程俱

平生囁嚅口出語無媚悅定非肉食姿賦分在藜藿僞

居得空園窮陋亦清絕分陰豈不惜飽睡送日月蕪菁  
不須種衆草今已茁朝來一雨過青細皆可掇東籬有  
更生杞枸僅堪埒乃知天隨生豈羨五鼎列堂萱不吾  
負芽甲破春雪縻身薦瓢簞解我憂思結薺花雖未繁  
著地爛於纈驚雷發蒸菌自可當夏鼃馬蘭亦芳脆人  
覓固凡劣晴朝當炙背俯僂事挑抉家人各盈檐汲井  
手自挈滿炊太倉陳侑以冬菹冽盤中長闌干置饋每  
虛撒恨無穉龍苞此味那得闕長謠青青槐饒液想庭

越妻孥復相誚男子志勲烈君非老浮圖菜本可長嚙  
况茲閒草木豈為刀匕設乃翁笑摩腹萬事付一呷此  
中有真趣勿為兒輩說

邨舍雜書

宋陸游

折蓮釀作醯采豆治作醬開歷揆日時汲井滌瓮盥上  
奉時祭須下給春耕餉咨爾後之人歲事不可曠

七言古

附長短句

北客置酒

宋王安石



紫衣操鼎置客前巾韝稻飯隨梁饘引刀取肉割啖客  
銀盤擘臠羹與鮮殷勤勸侑邀一飽卷牲歸館觴更傳  
山蔬野果雜飴蜜穠脯豕腊加魚煎酒酣衆史稍欲起  
小兒捫耳爭留連為渠止飲且少安一杯相屬非偶然  
汎舟城南會者五人分韻賦詩

宋  
蘇軾

紫鱸鱸魚賤如土得錢相付何足數碧筍時作象鼻彎  
白酒微帶荷心苦運肘風生看斫鱸隨刀雪落驚飛縷

不將醉語作新詩飽食應慚腹如鼓

謝景叔惠冬笋雍酥水梨三物

宋

黃庭堅

玉人憐我長蔬食走送厨珍不自嘗秦牛肥膩酥勝雪  
漢苑甘寒梨得霜冰底斲春生笋束豹文解籜饌寒玉  
見他桃李憶故園曉猿應殘遶窗竹

以蓴薑法魚糟蟹寄子瞻

宋

秦觀

鮮鯽經年漬醢醢團臍紫蠃脂填腹後春蓴茁滑於酥

先社薑芽肥勝肉鳧卵纍纍何足道  
飮餽盤飧亦時欲  
淮南風俗事瓶罌方法相傳為旨蓄  
魚鱗蜃醢薦蘆豆  
山藪谿毛例蒙錄輒送行庖當擊鮮  
澤居備禮無麋鹿  
冬夜與溥菴主說川食戲作

宋

陸游

唐安薏米白如玉漢嘉枬脯美勝肉  
大巢初生蠶正浴  
小巢漸老麥米熟龍鶴作羹香出釜  
木魚淪菹子盈腹  
未論索餅與饌飯最愛紅糟並炙粥  
東來坐閱七寒暑  
未嘗舉箸忘吾蜀何時一飽與子同  
更翦土茗浮甘菊

船中蔬飯

宋 楊萬里

食蕨食臂莫食拳  
食笋食梢莫食根  
何曾萬錢方下箸  
先生把菜亦飽去  
嶺南風物似江南  
笋如束薪蕨作籃  
先生食籍幾萬卷  
千巖萬壑皆厨傳

春盤

宋 方岳

菜菔根鬆縷冰玉  
萋蒿苗肥點寒綠  
霜鞭行茁軟於酥  
雪樹生釘肥勝肉  
與我同味焯絲辣  
知我長貧韭菹熟  
更蒸豢壓花層層  
畧糝鳧成金粟粟  
青紅餠飣閒梅柳

翠紫招邀醉松竹擎將碧脆卷月明嚼出宮商帶詩馥  
賜幡羞上老人頭家園不負將軍腹人生行樂未渠央  
物意趨新自相續不妨細雨看梅花且喜春風到茅屋  
林公勵志薰修七日不食走筆問之

明  
王世貞

東林公東林公禪房寂寂蒼苔空七日不受人天供出  
門雙頰桃花紅我不願白牛乳迴汝黃金色亦不願一  
麻復一米令汝肌膚削如腊藜羹豆飯香且圓樹影忽

過牆西偏即呼雜食吾亦可飽啜松風任意眠

五言律

孟倉曹步趾領新酒醬二物滿器見遺老夫

唐

杜甫

楚岸通秋屐胡牀面夕畦藉糟分汁滓甕醬落提攜飯  
糲添香味朋來有醉泥理生那免俗方法報山妻

題李上暮壁

唐

李商隱

舊著思玄賦新編雜擬詩江庭猶近別山舍得幽期嫩

割周顒韭肥烹鮑照葵飽聞南燭酒仍及潑醅時

雜興

宋唐庚

夜語不覺久晨興良獨難加之得卯酒晚矣恰朝餐笋  
蕨春生箸魚蝦海入盤南方禁太飽茗椀直須寬

初夏齋中雜題

元柳貫

壤隔谿流斷門依野次成初非慵應接自是寡將迎笋  
蕨搜山得鹽醯入市營貧居薄滋味盤膾敢求精

谿巖雜詠

元僧清珙

山厨修午供泉白似銀漿羹熟笋鞭爛飯炊粳米香油  
煎青頂蕈醋煮紫芽薑百味皆難及何須說上方

其二

結草便為菴年年用覆苫紙窗松葉暗竹屋蘚花粘麥  
飯惟饒火藜羹不點鹽生涯隨分過誰管世人嫌

句曲秋日郊居雜興

明楊基

編竹補疎籬生芻束酒旗雞豚田祖廟鷹犬獵神祠玉  
糝菰為粉璫酥豆作糜兒童採蘆葉爭學短簫吹



五言排律

食後

唐王績

田家無所有晚食遂為常  
菜剪三秋綠炊殮百日黃  
胡麻山麩樣楚豆野糜芳  
始曝松皮脯新添杜若漿  
葛花消酒毒萸蒂發羹香  
鼓腹聊乘興寧知逢世昌

七言律

謝主人惠綠酒白魚

唐徐夔

早起鵲聲頻送喜  
白魚芳酒寄來珍  
馨香乍揭春風甕

撥刺初辭夜雨津樽開最宜澄桂酒網疎殊未損霜鱗  
不曾垂釣兼親醞堪媿金臺醉飽身

泗洲除夜雪中黃實送酥酒

宋

蘇軾

關右土酥黃似酒揚州雲液卻如酥欲從元放覓拄杖  
忽有麴生來坐隅對雪不堪令飽煖隔船應已厭歌呼  
明朝積玉深三尺高枕牀頭尚一壺

二月十九日攜白酒鱸魚過詹使君食槐葉冷

淘

蘇軾

枇杷已熟燦金珠  
桑落初嘗豔玉蛆  
暫借垂蓮十分盃  
一澆空腹五車書  
青浮卵椀槐芽餅  
紅點冰盤藿菜魚  
醉飽高眠真事業  
此生有味在三餘

對客再次韻

宋陳造

客來一笑同鄉味  
便粉秋菰刷藕泥  
糟浥子薑仍舊法  
籠緘乾笋儼新題  
白魚紫蟹空濡沫  
窘兔驚麋想碣迷  
自揣臞儒合蔬糲  
放麀終恐媿巴西

閒居

宋唐庚

細細敲門細細應老翁方曲晝眠肱魚陂舊種千頭鱸  
桑徑新窠十畝繒菜足尚堪分地主米餘翻欲供鄰僧  
平生雅有乘桴興咫尺滄溟去未能

對食戲詠

宋  
陸游

一飽欣逢歲小穰時憑野餉誑枯腸橙黃出白金齏美  
菰脆供盤玉片香客送輪囷霜後蟹僧分磊落社前薑  
秋來幸是身強健聊為佳時舉一觴

謝余處恭送七夕酒果蜜食化生兒

宋 楊萬里

踉蹌兒孫忽滿庭，折荷騎竹臂春鶯。  
巧樓後夜迎牛女，留鑰今朝送化生。  
節物催人教老去，壺觴拜賜喜先傾。  
醉眠管得銀河鵲，天上歸來打六更。

予庚戌考試殿廬夜漏然五更之後

復打一更問之鷄人云宮漏有六更

以糟蟹洞庭甘送丁端叔，端叔有詩因和其韻。

楊萬里

斗州只解寄鵝毛，鼎肉何曾饋百牢。  
驅使木奴供露顆，

催科郭索獻霜螯鄉封萬戶只名醉天作一丘都是糟  
却被新詩太清絕喚將雪虐更風饕

謝史石窓送酒並茶

宋戴復古

遣來二物應時須客子行厨用有餘午困正憑茶料理  
春愁全仗酒消除不勝歡喜拜嘉惠無限慙慙作謝書  
君既有來何以報一牀蘄簟兩淮魚

十七日驛中作春盤

是日早行始  
憶昨日立春

元

耶律楚材

昨朝春日偶然忘試作春盤我一嘗木案初開銀線亂  
砂瓶煮熟藕絲長勻和豌豆揉葱白細剪萋蒿點韭黃  
也與何曾同是飽區區何必待膏粱

贈富察元帥

耶律楚材

使君排飯宴南谿不枉從君鳥鼠西春薤旋澆濃鹿尾  
臘糟微浸軟駝蹄絲絲魚膾明如玉屑屑雞生爛似泥  
白面書生知此味從今更不嗜黃齏

其二

主人開宴醉華胥一派絲篁沸九衢黯紫蒲萄垂馬乳  
輕黃芭欖燦牛酥金波汎蟻斟歡白雪浪浮花點酪奴  
忙裏偷閒誰若此西行萬里亦良圖

謝飛卿飯再用韻紀西遊事

耶律楚材

河中花木蔽春山爛賞東風縱寶鞍留得晚瓜過臘半  
藏來秋果到春殘親嘗芭欖寧論價自釀蒲萄不納官  
常歎不才還有幸滯留遐域得佳餐

西域尋思子城西  
遠目為河中府

四月二十八日起屢賜鮮笋青梅鱠魚枇杷楊



梅雪梨鮮藕

明程敏政

都城三伏暑方炎天上分鮮我亦霑  
緘發紫泥留榼筥香生青箬帶冰鹽  
南州遠貢來何數北客初嘗味更添  
為感歲時繙賜帖不知殘日下疎簾

丙戌冬至南郊扈駕聖母軫念天寒特賜薑蘇  
杏仁一盒

明于慎行

黃門飛輦到天壇傳道東朝賜講官  
祇為甘泉勞扈從特從溫室下盤餐  
調蘭欲動先春色斲桂渾消午夜寒

慈念殷勤知有望慚無一字罄衷丹

五言絕句

和晏相公湖上

宋韓維

穫水登紅稻篙舟割紫菱杯盤見秋物江海思飛騰

遣懷絕句

明顧璘

野鮮蒼兕美山鮮鷓鴣香市笋擣芭出倉禾帶把藏

七言絕句

蔬食

唐陸龜蒙

孔融不要留殘膾庾悅無端客子驚香稻熟來秋菜嫩  
伴僧餐了聽云何

和龐公謝子魚荔枝

宋 蔡襄

霜鱗分不登枯肆丹實全應勝木奴欲効野芹羞獻去  
敢期佳什墜驪珠

六月二十七日望湖樓醉書

宋 蘇軾

烏菱白芡不論錢亂繫青菰裏綠盤忽憶嘗新會靈觀  
滯留江海得加餐

次韻錢穆父馬上寄蔣穎叔

蘇軾

玉關不用一丸泥自有長城鳥鼠西  
剩與故人尋土物  
臘槽紅麴寄駝蹄

秋日郊居

宋陸游

秋日留連野老家朱槃鮓齋粢如花  
已炊藟散真珠米  
更點丁坑白雪茶

小飲俎豆頗備江西淮浙之品戲題

宋楊萬里

滿盤山海眩芳珍未借前籌已噉津  
鱉醬子魚總佳客  
玉狸黃雀是鄉人

明仁殿進講

元  
貢師泰

殿前冠佩儼成行玉椀金瓶進早湯  
自愧平生飯藜藿  
朝來得食大官羊

灤京雜詠

元  
楊允孚

嘉魚貢自黑龍江西域蒲萄酒更良  
南土至奇誇鳳髓  
北陲異品是黃羊

其二

內人調膳侍君王玉仗平明出建章  
宰輔乍臨闔闔表  
小臣傳旨賜湯羊

其三

湯羊內膳日差排紅帖呼名到玉階  
底事金吾呵不住  
腰間懸得象牙牌

其四

海紅不似花紅好杏子何如芭欖良  
更說高麗生菜美

總輸山後蔭菰香

海紅花紅色攪仁皆果名高麗人以生菜裹飯食之火山產蔭菰

輦下曲

元張昱

儒臣奉詔修三史丞相銜兼領總裁卒士院官傳賜宴  
黃羊桐酒滿車來

糟豚蹄東陽酒送理之

元薛漢

彭生失足落糟丘醉入肌膚味更優亦有麴生差可意  
伴君倚檻看春流

次韻答石室元晦

元僧大訢

不識往來相熟未青衣迎棹慣看人糗糒分餉家家似  
薯蕷炊香頓頓新

鄰農以麥飯菜羹見餉

明  
居節

來年作飯菜為羹慚愧山農餉我情一飽年來非易得  
五湖無地可躬耕

御定佩文齋詠物詩選卷二百四十二



欽定四庫全書蒼要卷一萬八千八百六十五

集部

御定佩文齋詠物詩選卷二百四十三

酒類

五言古

子夜歌

晉  
樂府

舉酒待相勸酒還杯亦空願因微觴會心感色亦同

前有一罇酒行

晉  
傅玄

置酒結此會主人起行觴玉罇兩楹間絲理東西廂舞

袖一何妙變化窮萬方賓主齊德量欣欣樂未央同享  
千年壽朋來會此堂

飲酒

晉  
陶潛

故人賞我趣挈壺相與至班荆坐松下數斟已復醉父  
老雜亂言觴酌失行次不覺知有我安知物為貴悠悠  
迷所留酒中有深味

其二

子雲性嗜酒家貧無由得時賴好事人載醪祛所惑觴

來為之盡是謔無不塞有時不肯言豈不在伐國仁者  
用其心何嘗失顯默

對酒

梁張率

對酒誠可樂此酒復芳醇如華良可貴似乳更堪珍何  
當留上客為寄掌中人金樽清復滿玉碗亟來親誰能  
共遲暮對酒惜芳辰君歌尚未罷却坐避梁塵

對酒

陳張正見

當歌對玉酒匡坐酌金罍竹葉三清汎蒲萄百味開風

移蘭氣入月逐桂香來獨有劉將阮忘情寄羽杯

對酒

陳岑之敬

色映臨池竹香浮滿砌蘭舒文汎玉盃漾蟻溢金盤簫  
曲隨鸞易笳聲出塞難惟有將軍酒川上可除寒

蒙賜酒

北周  
庾信

金膏下帝臺玉瀝在蓬萊仙人一遇飲分得兩三杯忽  
聞桑葉落正值菊花開阮籍披衣進王戎含笑來從今  
覓仙藥不假向瑤臺

答王司空餉酒

庾信

今日小園中桃花數樹紅  
開君一壺酒細酌對春風  
未能扶畢卓猶足舞王戎  
仙人一捧露判不及杯中  
蒲州刺史中山公許乞酒  
一車未送

庾信

細柳望蒲臺長河始一迴  
秋桑幾過落春蟻未曾開  
瑩角非難馭槌輪稍可催  
只言千日飲舊遂中山來

月下獨酌

唐李白

天若不愛酒酒星不在天地若不愛酒地應無酒泉天  
地既愛酒愛酒不愧天已聞清比聖復道濁如賢賢聖  
既已飲何必求神仙三杯通大道一斗合自然但得醉  
中趣勿為醒者傳

岐亭

宋  
蘇軾

昨日雲陰重東風融雪汁遠林草木暗近舍煙火濕下  
有隱君子嘯歌方自得知我犯寒來呼酒意頗急撫掌  
動鄰里遶邨捉鵝鴨房櫓鏘器聲蔬果照巾幘久聞蔓

蒿美初見新芽赤洗盞酌鴛黃磨刀削熊白須臾我竟  
醉坐睡落巾幘醒時夜向闌唧唧銅瓶泣黃州豈云遠  
但恐朋友缺我當安所主君亦無此客朝來靜菴中惟  
見峯巒集

洞庭春色

蘇軾

二年洞庭秋香霧長嘆手今年洞庭春玉色疑非酒賢  
王文字飲醉筆龍蛇走既醉念君醒遠餉為我壽餅開  
香浮座盞凸光照牖方傾安仁醺莫遣公遠喚要當立

名字未用問升斗應呼釣詩鉤亦號掃愁帚君知蒲桃  
惡正是嫫母黜須君灑海杯澆我談天口

和陶淵明飲酒

蘇軾

頃者大雪年海波翻玉英有士常痛飲飢寒見真情牀  
頭有敗榼孤坐時一傾未能平體粟且復澆腸鳴脫衣  
裹凍海每醉念此生

其二

民勞吏無德歲美天有道暑雨避麥秋溫風送蠶老三



曠初有聞一溉未濡稿詔書寬積欠父老顏色好再拜  
賀吾君獲此不貪寶頽然笑阮籍醉几書謝表

其三

淮海雖故楚無復輕揚風齋厨聖賢雜無事時一中誰  
言大道遠正賴三杯通使君不夕坐衙門散刀弓

有客

宋張九成

春雨止復作閉門無與居童奴告予言有客叩吾廬東  
帶出見之頽然一丈夫手攜一樽酒辭氣何晏如謂言

久聞名曾未瞻簪裾天寒宜飲酒一杯聊以娛盤殮亦  
草草蔬果間谿魚顏色溫勝玉言談貫如珠豈期有道  
者而來警我愚酒酣意兩適心閒樂有餘四海元有人  
君勿輕荒區

寒食對酒

宋  
楊萬里

荔枝園園花寒食日日雨先生老多病頗已踈綠醕兒  
童喜時節笑語治樽俎南烹既前陳北果亦草具螭蟬  
方纔甘笋蕨未作苦先生欲獨醒兒女難多拒初心且

一杯三杯亦漫許醒時本強飲醉後忽快舉一杯至三  
杯一二三四五偶然問兒輩卒爵是何處兒言翁但醉  
已忘酒巡數

舟中新暑止酒

楊萬里

新暑酒不宜作熱妨夜睡不如看人飲亦自有醉意彼  
飲吾為嚙所美過於味同舟笑吾癡吾不羨渠醉安知  
醉與醒誰似誰不似

飲酒

金  
元好問

西郊一畝宅閉門秋草深牀頭有新釀意慙成孤斟舉  
杯謝明月蓬華肯相臨願將萬古色照我萬古心

歡飲

元  
劉因

同類天地中相親理所宜前後億萬年而我生此時前  
予既不及後孰能待之同時四海內徧識將無期所識  
既無幾賞心又當誰政有賞心人會遇亦復希當其會  
遇時豈無事相違今朝好風色不飲君何辭

對酒

元  
倪瓚

題詩石壁上把酒長松間  
遠水白雲度晴天孤鶴還  
虛亭暎苔竹聊此息躋攀  
坐久日已夕春鳥聲關關

和陶飲酒

明  
陳憲章

木犀冷於菊更後十日開  
清風吹芳香芳香襲人懷  
千回嚙入腹五內無一乖  
雖靡鸞鳳吟亦有鷦鷯棲  
昔者東籬飲百榼醉如泥  
那知此日花復與此酒諧  
一曲盡一杯酩酊花間迷  
赤脚步明月酒盡吾當回

凍醴

明  
王鏊

傾家五斗米，衝缸三斗水。一夜北風霜，長稜生梓甯。君  
勿嫌其薄，洗袋副未已。猶足勝沽來，推恩到奴婢。一笑  
呵凍硯，援筆賦凍醴。

六言古

飲酒樂

晉  
陸機

蒲萄四時芳醇，瑠璃千鐘舊賓。夜飲舞遲銷燭，朝醒絃  
促。催人春風秋月，恒好驩醉日月言新。

七言古

附長短句

金陵酒肆留別

唐  
李白

白門柳花滿店香  
吳姬壓酒喚客嘗  
金陵子弟來相送  
欲行不行各盡觴  
請君問取東流水  
別意與之誰短長

新豐主人

唐  
儲光義

新豐主人新酒熟  
舊客還歸舊堂宿  
滿酌香含北砌花  
盈尊色泛南軒竹  
雲散天高秋月明  
東家少女解秦箏  
醉來忘却巴陵道  
夢中疑是洛陽城

湖上對酒行

唐  
張謂

夜坐不厭湖上月晝行不厭湖上山眼前一樽又長滿  
心中萬事如等閒主人有黍百餘石濁醪數斗應不惜  
即今相對不盡歡別後相思復何益茱萸灣頭歸路賒  
願君且宿黃公家風光若此人不醉參差辜負東園花

李雷言遺酒

宋梅堯臣

大梁美酒斗千錢欲飲常被飢窘煎經時一滴不入口  
漱齒費盡華池泉昨日靈昌兵吏至跪壺曾不候報箋  
赤泥圻封傾瓦盎母妻共嘗婢流涎鄰家葡萄未結子



引蔓垂過高牆巔當街賣杏已黃熟獨堆百顆充盤筵  
老年牙疎不喜肉況乃下箸無腥羶空腸易醉忽酩酊  
倒頭夢到上帝前賜臣蒼龍跨入月不意正值姮娥眠  
無人來顧傍玉兔便取作腊下九天拔毛為筆筆如椽  
狂吟一掃一百篇其間長句寄東郡東郡太守終始賢  
切莫汲竭滑公井留釀此醕待我傳

真一酒歌

宋蘇軾

空中細莖挿天芒不生沮澤生陵岡涉閼四氣更六陽

森然不受螟與蝗飛龍御月作秋涼  
蒼波改色屯雲黃  
天旋雷動玉塵香起搜十裂照坐光  
跼趺牛噉安且詳  
動搖天關出瓊漿  
壬公飛空天女藏  
三伏遇井了不嘗  
釀為真一和而莊  
三杯儼如侍君王  
湛然寂照非楚狂  
終身不入無功鄉

蜜酒歌

蘇軾

真珠為漿玉為醴  
六月田夫汗流泚  
不如春甕自生香  
蜂為耕耘花作米  
一日小沸魚吐沫  
二日眩轉清光活

三日開甕香滿城快瀉銀瓶不須撥百錢一斗濃無聲  
甘露微濁醖醘清君不見南園採花蜂似雨天教釀酒  
醉先生先生年來窮到骨問人乞米何曾得世間萬事  
真悠悠蜜蜂大勝監河侯

考亭陳國器以家釀餉吾友人卓民表民表以  
飲余香味色皆清絕不可名狀因為製名曰

武彝仙露仍賦一首

宋朱松

二年飲水閩中邨忽見玉醴傾蠻尊涓涓醖醘灌熱腦

耿耿沆瀣明朝暎早塵久漲城市暗客夢欲挽江湖吞  
何人遠致雙鯉信知我來叩羅雀門不須邀月已清絕  
尚恐熨齒當微溫要從華池汲真液豈獨玄鬢薶愁根  
微芒已識投轄客斌媚似返當壚魂奇功誰續伯倫頌  
妙意要與淵明論胸中我自有涇渭筆下君已傾崑崙  
詩成寄與約他日飲君與我空瓶盆

林知常惠白酒六尊仍示酒法作十韻謝之

宋

王十朋

老大生涯付杯酒種秫辛勤三百畝東臯遺法已失傳  
蜜汁釐漿不通口邇來軟飽經月無豈有清歡對朋友  
百錢強就邨醞醉終夜蔬腸作雷吼先生祇把文字耕  
妙意能施杜康手憐我新愁餘萬斛那更澆腸無五斗  
分惠青州六從事秘法兼蒙傳肘後便同北海歌不空  
免似東坡歎烏有慨予偃蹇老更饕感激故人情意厚  
會須續遣白衣來籬畔黃花欲重九

家釀紅酒美甚戲作

宋

曾幾

麴生奇麗乃如許酒母穠華當若何向人自作醉時面  
遣我寧不蒼顏酡得非琥珀所成就更有丹砂想盪磨  
可憐老杜不對汝但愛引頸舟前鶯

生酒歌

宋 楊萬里

生酒清如雪煮酒赤如血煮酒不如生酒冽煮酒只帶  
煙花氣生酒不離泉石味石根泉眼新汲將麴米釀出  
春風香坐上豬紅間熊白甕頭鴨綠變鶯黃先生一醉  
萬事已那知身在塵埃裏

蘇子翼送黃精酒

宋 朱 弁

仙經何物堪却老較功無如太陽草龍銜雞銜名雖異  
兔公羊公事可考蘇君真是神仙裔橘井陰功貫穹昊  
雲笈書成數萬言銀闕珠宮用心早獨知此物有奇效  
福地名山為儲寶不憚林泉新斲掘斥去杵臼謝節擣  
况從高士論麴糜更課公田收秣稻一朝靈液浮瓮盎  
三冬浩氣生襟抱且欣軟飽得澆腸漫說逆流上補腦  
眼碧那憂散黑花髮斑故應還翠葆賈傳只嫌松醪陋

劉隋敢誇桑落好直須五斗論解醒寧待三杯乃通道  
誰知萬里落旄人亦許飽尊自傾倒為君喚迴雪窖春  
八載羈愁供一掃曼倩宜分此日桃安期莫詫他年棗  
何須更採石斛花已覺容顏不枯槁根連石室喜入夢  
句擬桐谿媿摘藻平生我亦愛書札朱髓綠腸勤探討  
幸君汲引成此志鶴駕駸駸望仙島吞腥啄腐非夙心  
歲晚茲言良可保

虞舜卿送橙酒

金  
李純甫



屏山持律不作詩硯塵筆禿縈蛛絲枯腸燥吻思戛戛  
法當以酒疏瀹之何物督郵風味惡振觸閒愁無處著  
苦思新釀壓橙香世間那有揚州鶴乞詩送酒並柴門  
瀛洲仙裔令公孫肝腸憤痒芒角出傾瀉長句如翻盆  
怪汝胸中雲夢大老我眼皮危塞破徑呼短李與黔王  
快取錦囊收玉唾

善之入雪蘭臯置酒小詩紀坐中事

元

牟

巖

病翁禁酒仍禁脚不省人間有行樂主人最善客善之  
邀我來同雞黍約清樽快吸船落埭頗悔從前謝杯杓  
故人久別如此酒一時傾倒慰離索更擘新笋供春淘  
狐泉槐葉未須學髮勤入鼎資過熟老饕恣吞不勞嚼  
人生難得是合併開口一笑良不惡呼車載我雨中歸  
阿香推車散飛電分明戒我輕破戒故把春衫都濕却  
我亦投牀作雷吼無數殘紅枕邊落

招子昂飲歌

元  
戴表元

與君相逢難草草與君相逢苦不早人生何處少泥塗  
此日飄零武林道武林道中馬如雲閉屋狂歌人不聞  
狂歌自笑君亦笑依然狂絕不如君君歌豈是真狂者  
青衫少日春瀟灑至今俊筆五花紋最惜青眸十行下  
虛名何用等灰塵不如世上蓬蒿人黃金偏趨不貧室  
白髮難老無愁身風雨無情亦如此淒淒但聒窮人耳  
不見朱樓高到天鳳簫龍管連朝起連朝笙管可奈何  
我歌且止須君歌青天白雪望不極坐見綠水生層波

我生何為被狂惱江頭魚肥新酒好從今作樂操醉倒  
與君相逢難草草

醉時歌

元黃庚

茫茫古堪輿何日分九州九州封域如許大僅能著我  
胸中愁澆愁須是如澠酒麴波釀盡銀河流貯以倒海  
千頃黃金壘酌以傾江萬斛玻瓈舟天為青羅幕月為  
白玉鉤月邊天孫織雲錦製成五色蒙茸裘披裘把酒  
踏月窟長揖北斗相勸酬一飲一千石一醉三千秋高

卧五城十二樓剛風冽冽吹酒醒起來披髮騎赤虬大  
呼洪崖拉浮丘飛上崑崙山頂頭下視塵寰一培塿揮  
斥八極逍遙遊

僕嘗夜夢從彥成飲彥成曰此荔枝漿也飲之  
令人壽子能為我賦之當贈三百壺余自口  
占一詩覺乃夢也及會玉山聞彥成釀酒果  
名荔枝漿以夢白之不覺大笑玉山曰君當  
書此詩吾當與子致酒以質所夢因莞爾書

之彥成見之必更一笑也

元 陳 基

涼州莫漫誇葡萄中山枉詫松為醪仙人自釀真一酒  
洞庭春色嗟徒勞瓊漿滴盡生荔枝玉露瀉入黃金卮  
一杯入口壽千歲安用火棗並交梨不願青州覓從事  
不願步兵為校尉但令呼鶴共呼鸞日日從君花下醉  
新麴米酒歌

元

蒲道源

驕陽行空勢方烈刈麥農夫寧憚熱天旋雷動飛玉塵  
霧渤雲蒸成麴蘖麥秋方罷還插秧擺耜西風千頃黃

腰鎌肩擔行相逐共趁晴色催登場碓舂糠粃光如雪  
汲泉淅米令清潔炊糜粳麴同糝和元氣細縕未分裂  
甕中小沸微有聲魚沫吐盡秋江清脫巾且澆仍且飲  
陶然自覺春風生君不見淵明有田惟種秫醉裏作詩  
聊自述又不見幽風十月穫稻忙春酒介壽俱徜徉但  
願年年遇豐稔更須三萬六千場

蒲萄酒

元  
周 權

翠虬夭矯飛不去領下明珠脫寒露累累千斛晝夜春

列甕滿浸秋泉紅數宵醞月清光轉穠腴芳髓蒸霞暖  
酒成快瀉官壺香春風吹凍玻璃光甘逾瑞露濃欺乳  
麴生風味難通譜縱教典却鷓鴣裘不將一斗博涼州

紅酒歌

元  
楊維禎

楊子渴如馬文園宰官特賜桃花源桃源頭釀春酒  
滴滴真珠紅欲然左官忽落東海邊渴心鹽井生炎煙  
相呼西子湖上船蓮花博士飲中仙如銀酒色未為貴  
令人長憶桃花泉膠州判官王牒賢憶昔同醉瓊林筵



別來南北不通問夜夢玉樹春風前朝來五馬過陋廛  
贈以同袍五色彩副以五鳳樓頭箋何以澆我磊落抑  
塞之感慨桃花美酒斗十千垂虹橋下水拍天虹光散  
作真珠涎吳娃鬪色櫻在口不放白雪盈人顛我有文  
園渴苦無曲奏鴛鴦絃預恐沙頭雙玉盡力醉未與長  
瓶眠徑當垂虹去鯨量吸百川我歌君扣舷一斗不惜  
詩百篇

麻姑酒歌

明  
杜  
庠

麻姑之山撐半空麻姑之水飛長虹奔流到城不到海  
釀春盡入糟丘中前年足跡半天下曾訪麻姑當盛夏  
麻姑酌我三百杯玉山頽然醉方罷麒麟之脯擘薦酒  
世間此味何曾有醒來欲再訪麻姑萬疊千重雲有無  
君家留我亦不減此味酒泉如海何須沽

五言律

詠雲酒

唐

駱賓王

朔空曾紀歷帶地舊疏泉色汎臨碣瑞香流赴蜀仙款

交欣散玉洽友悅沈錢無復中山賞空吟吳會篇

酒

唐  
李嶠

孔坐洽良儔陳筵幾獻酬臨風竹葉滿湛月桂香浮每  
接高陽宴長陪河朔遊會從元石飲雲雨出圓丘  
雪中酒熟欲攜訪吳監先寄此詩

唐  
白居易

新雪對新酒憶同傾一杯自然須訪戴不必待延枚陳  
榻無辭解袁門莫嬾開笙歌與談笑隨分自將來

雪夜對酒招客

白居易

帳小青氍毹暖杯香綠蟻新醉憐今夜月歡憶去年人  
閣落燈花燼閒生草坐塵慙勲報絃管明日有嘉賓

酒醒

唐元稹

飲醉日將盡醒時夜已闌暗燈風焰曉春席水窗寒未  
解縈身帶猶傾墜枕冠呼兒問狼籍疑是夢中驩

家釀

宋朱子

聞道兵厨盛春泉響醵筯定知盈榼送不待扣門求沆

濯應難比茅柴祇自羞此身從法縛好客為公留

酒市

朱子

聞說崇安市家家麴米春樓頭邀上客花底覓南鄰詎  
有當壚子應無折券人勸君渾莫問一酌便還醇

對酒

宋  
陸游

密篠持苫屋寒蘆用織簾  
氣肩柴熟罨尊菜豉初添  
黃甲如盤大紅丁似蜜甜  
街頭桑葉落相喚指青帘

盧申之載酒舟中分韻得明字

宋 趙師秀

閒人間處住載酒荷高情小舍寧容客同舟却向城弄  
花忘晝暑憂穀念秋晴歸路雖無月銀河亦自明

涯翁示獨酌二詩序云是日飲松江酒次韻奉

謝

明 顧 清

城闕非長往山林是夙期時開問字酒不賦解嘲詩綠  
樹停觴久紅闌點筆遲奚童斟酌慣深淺自能知

元旦後一日劉德儀送酒

明 沈 周

使者雙瓶至蓬門向晚開停肩慰泥滑解羃省香來染  
指憐佳味挑燈引細杯明朝攜小榼江上候新梅

閩中與吳元翰過馬季聲家酌

明  
吳 兆

多君新釀熟邀我客中閒剖橘香生手銜杯暖汎顏敗  
藤縈格下爭雀隨籬間門巷斜鄰寺朝昏易往還

五言排律

早飲湖州酒寄崔使君

唐  
白居易

一榼扶頭酒泓澄瀉玉壺十分蘸甲酌潋灩滿銀盃捧  
出光華動嘗看氣味殊手中稀琥珀舌上冷醍醐瓶裏  
有時盡江邊無處沽不知崔太守更有寄來無

答皇甫十郎中秋深酒熟見憶 白居易

煙景冷蒼茫秋深夜夜霜為思池上酌先覺甕頭香未  
暇傾巾漉還應染指嘗醍醐慙氣味琥珀讓晶光若許  
陪歌席須容散道場月中齋戒畢猶及菊花黃

七言律



錢湖州以箸下酒李蘇州以五醖酒相次寄到

無因同飲聊詠所懷

唐

白居易

勞將箸下忘憂物寄與江城愛酒翁  
錨脚三州何處會  
甕頭一盞幾時同  
傾如竹葉盈樽綠  
飲作桃花上面紅  
莫怪殷勤醉相憶  
曾陪西省與南宮

橋亭卯飲

白居易

卯時偶飲齋時卧林下  
高橋橋上亭松影過窗眠始覺  
竹風吹面醉初醒  
就荷葉上包魚鮓  
當石渠中浸酒瓶

生計悠悠身兀兀甘從妻喚作劉伶

李羽處士寄惠新醞走筆戲酬

唐  
溫庭筠

高譚有伴還成數沈醉無期即是鄉已恨流鶯欺謝客  
更將浮蟻與劉郎簷前柳色分張綠窗外花枝借助香  
所恨玳筵紅燭夜草玄寥落近迴塘

和魯望看壓新醅次韻

唐  
皮日休

一簣松花細有聲旋將渠椀撇寒清秦吳只恐菊來近

劉項真應釀得平酒德有神多客頌醉鄉無貨没人爭  
五湖煙水郎山月合向樽前問姓名

看壓新醅寄懷襲美

唐  
陸龜蒙

曉壓糟牀漸有聲旋如荒澗野泉清身前古態熏應出  
世上愁痕滴合平飲啄斷年同鶴儉風波終日看人爭  
樽中若使常能涿兩綬通侯總強名

白酒兩瓶送崔侍御

唐  
徐夔

雪化霜融好潑醅滿壺冰凍向春開求從白石洞中得

攜向百花巖畔來幾夕露珠寒貝齒一泓銀水冷瓊杯  
湖邊送與崔夫子誰見嵇山盡日顏

斷酒

徐夤

因論沈酒覺前非便碎金罍與羽卮採茗早馳三蜀使  
看花甘負五侯期窗間近火劉伶傳坐右新銘管仲辭  
此事十年前已說匡廬山下老僧知

依韻和正仲寄酒因戲之

宋

梅堯臣

上字黃封誰可識偷傳王母法應真清淮始變醅猶薄

句水新來味更醇  
欲擬比酥酥少色  
曾持勸客客何人  
紅梅雖是吾家物  
老去無心一醉春

謝孫抗員外惠酒

宋 余靖

白衣遠遠到江樓  
報道攜壺助勝遊  
醉眼便堪終日富  
離腸先破一春愁  
梅梢背嶺開猶晚  
雪片當風舞未休  
此景滿懷方得意  
不須千釀敵封侯

謝堯夫寄新酒

宋 韓維

故人一別兩重陽  
每欲從之道路長  
有客忽傳龍坂至

開樽如對馬軍嘗定將瓊液都為色疑有金英密借香  
却笑當年彭澤令籬邊終日歎空觴

庚辰歲正月十二日天門冬酒熟余自漉之且

漉且嘗遂以大醉

宋

蘇軾

自撥牀頭一甕雲幽人先已醉濃芬天門冬熟新年喜  
麴米春香並舍聞菜圃漸疎雲漠漠竹扉斜掩雨紛紛  
擁裘睡覺知何處吹面東風散纈紋

新釀桂酒

蘇軾

搗香篩辣入瓶盆  
盎盎春谿帶雨渾  
收拾小山藏社甕  
招呼明月到芳樽  
酒材已遣門生致  
菜把仍叨地主恩  
爛煮葵羹斟桂醕  
風流可惜在蠻村

真一酒

蘇軾

撥雪披雲得乳泓  
蜜蜂又欲醉先生  
稻垂麥仰陰陽足  
器潔泉新表裏清  
曉日著顏紅有暈  
春風入髓散無聲  
人間真一東坡老  
與作青州從事名

同家弟用前韻謝判府惠酒

宋陳與義

銜杯樂聖便稱賢無酒猶堪卧甕間使者在門催僕僕  
麴車入夢正班班不煩白水真人力來自青城道士山  
千載王弘今並美未應杞菊賦寒慳

對酒

陳與義

陳留春色撩詩思一日搜腸一百迴燕子初歸風不定  
桃花欲動雨頻來人間多少須微祿夢裏相逢記此杯  
白竹扉前容醉舞煙邨渺渺欠高臺

夜宿房谿飲野人張珣家桂葉鹿蹄酒其法以



桂葉為餅以鹿蹄煮酒釀以八月過是期味

減云

宋  
楊萬里

桂葉揉青作麴投鹿蹄煮醪趁涼筍落杯瑩滑水中水  
過口森嚴菊底秋玉友黃封猶退舍蠶湯蜜汁更輸籌  
野人未許傳醅法剩買雙瓶過別州

余與客嘗茶麋瀉酒客求其法因戲答之

楊萬里

月中露下摘茶麋瀉酒銀瓶花倒垂若要花香薰酒骨

莫教玉醴濕瓊肌一杯隨我無何有百罰知君亦不辭  
勅賜深卮能幾許野人時復一中之

酒

宋 徐璣

才傾一盞碧澄澄自是山妻手法成不遣水多防味薄  
要令麴少得香清涼從荷葉風邊起煖向梅花月裏生  
世味總無如此味深知此味即淵明

秋露白酒熟卧聞槽聲喜而得句可行當同賦  
也

元 許有壬

治麴辛勤夏竟秋奇功今日遂全收日華煎露成真液  
泉脉穿巖咽細流不忍潏醅斟甕面且教留響在牀頭  
老懷磊磊行澆盡三徑黃花兩玉舟

碧筩飲次胡丞韻

元張昱

小刺攢攢綠滿莖看揜羅袖護輕盈分司御史心先醉  
多病相如渴又生銀浦流雲雖有態銅盤清露寂無聲  
當年欲博千金笑故作風荷帶雨傾

夏正夫邀飲蛇酒

明杜庠

藤峽香醪遠寄來一樽公館晚涼開功同薏苡能消瘴  
色勝葡萄乍潑醅錢在杖頭宜贖買臂懸弓影莫深猜  
主人情重憐衰病入夜張燈再舉杯

雪中崇之送麻姑酒一尊

明  
費宏

醒眼寒窗對白虛馬軍來值卧瓶初呼童旋覓團臍蠅  
謀婦方烹巨口魚蕉葉淺斟能稍稍梅花欲放正踈踈  
心交久矣醇醪醉豈必盱泉味有餘

沽酒

明  
周用

一春白髮鬪絲長無奈春歸喚酒嘗日曬一林梅子熟  
風吹滿店柳花香漢江初發葡萄綠銀海頻浮琥珀光  
消得百年三萬日不妨還醉六千場

雪酒為孫司徒賦奉次涯翁先生

明邵寶

玄酒曾聞侑大烹釀來寒雪品尤清也知承露能高致  
須信藏冰為曲成光動夜杯如有物暖消春甕本無聲  
相看莫謂人間味一滴先天萬古情

戲和石潭嘗酒

明 顧清

不惜糟牀劈作柴已呼兒子旋安排只愁新甕能幾榼  
遂有高軒駐兩階永夜燭光隣辟駭他年談苑幾人偕  
細君不學劉伶婦晚出雙魚更自佳

次韻謝凌季行送新釀六尊

明 吳寬

寒掩蓬門午不開東鄰新釀叩門來黃封內法何從授  
紅印他家自滿堆飲量笑添清澮闊吟肩醉聳玉山嵬  
青州舊例今重舉從事多能未減裁

酒熟志喜

明 王 鏊

常年送酒媿諸鄰  
斗覺今年富十分  
水法特教擔柳毅  
麴材先已謝桐君  
牀頭夜滴晴階雨  
甕面香浮暖閣雲  
莫笑陶公巾自漉  
年來正策醉鄉勳

嘗酒用前韻

明 陸 容

飲盡君家碧甕春  
香痕狼籍上羅巾  
詩壇不遣前盟負  
郎署應憐此會新  
歸騎已聞珂撼玉  
留人莫待燭銷銀  
步兵故有風流在  
笑殺金貂買醉人

弟洛為猗氏學諭以襄陵酒方見示如法釀造

良佳賦此答意

明李濂

襄陵自昔稱名酒猗氏於今得秘方傳示故園知汝意  
釀成新味與誰嘗金盤滴露泠泠白玉碗浮春冉冉香  
倚甕題詩寄吾弟西齋風雨憶聯牀

七言排律

詠家醞十韻

唐白居易

獨醒從古笑靈均長醉如今數伯倫舊法依稀傳自杜



新方要妙得於陳井泉王相資重九麴蘖精靈用上寅  
釀糯豈勞炊范黍撇筭何假漉陶巾常嫌竹葉猶凡濁  
始覺榴花不正真甕揭開時香酷烈瓶封貯後味甘辛  
捧疑明水從空化飲似陽和滿腹春色洞玉壺無表裏  
光搖金盞有精神能消忙事成閑事轉得憂人作樂人  
應是世間賢聖物與君還往擬終身

五言絕句

看釀酒

唐  
王績

六月調神麴正朝汲美泉從來作春酒未省不經年

過酒家

王績

竹葉連糟翠蒲萄帶麴紅相逢不令盡別後為誰空

其二

對酒但知飲逢人莫强牽倚壚使得睡橫甕足堪眠

戲主人

唐孟浩然

客醉眠未起主人呼解醒已言鷄黍熟復說甕頭清

醉後

唐權德輿

美祿與賢人相逢自可親願將花柳月盡賞醉鄉春

敕賜長壽酒

權德輿

恩霑長壽酒歸遺同心人滿酌共君醉一杯千萬春

酬馬侍郎寄酒

唐韓愈

一壺情所寄四句意能多秋到無詩酒其如月色何

李舍人少尹惠家醞一小榼立書絕句

唐竇牟

禁鎖天漿嫩虞行夜月寒一瓢那可醉應遣試嘗看

酬范侍御

唐 鮑溶

聞道中山酒一杯  
千日醒黃鶯似傳語  
勸酒太丁寧

春釀

唐 趙嘏

春釀正風流  
梨花莫問愁  
馬卿思一醉  
不惜鸛鷀裘

醉眠

唐 杜牧

秋醪雨中熟  
寒齋落葉中  
幽人本多睡  
更酌一罇空

獨酌

杜牧

窗外正風雪  
擁爐開酒缸  
何如釣船雨  
篷底睡秋江

閒夜酒醒

唐 皮日休

醒來山月高孤枕羣書裏酒渴漫思茶山童呼不起

雜詩絕句

宋 梅堯臣

河畔有釣翁團泥為甕正坐想秦人聲思傾杜陵酒

飲

金 李俊民

竹葉杯中醖金釵坐上春淺斟低唱境猶道是粗人

碧筩飲

明 高 啓

綠觴卷高葉醉吸清香度酒瀉正何如風傾曉盤露

平望夜泊

明王穉登

月下壓酒聲將船繫楊柳  
明日到家近不須沽一斗

六言絕句

寄李袁州桑落酒

唐郎士元

色比瓊漿猶嫩香同甘露  
仍春十千提攜一斗遠送瀟湘故人

七言絕句

戲問花門酒家翁

唐岑參

老人七十仍沽酒，千壺百甕花門口。  
道傍榆莢巧似錢，摘來沽酒君肯否？

謝嚴中丞送青城山道士乳酒一瓶

唐  
杜甫

山甕乳酒下青雲，氣味濃香幸見分。  
鳴鞭走送憐漁父，洗盞開嘗對馬軍。

設酒寄獨孤少府

唐  
王建

自看和釀一依方，緣著松花色較黃。  
不分君家新酒熟，

好時收得被回將

招客

唐

白居易

日午微陰且暮寒春風冷峭雪乾殘  
碧氈帳下紅爐畔  
試為來嘗一盞看

自勸

白居易

憶昔羈貧應舉年脫衣典酒曲江邊  
十千一斗猶賒飲  
何況官供不著錢

先醉

唐

元稹



今日樽前敗飲名三杯未盡不能傾怪來花下長先醉  
半是春風蕩酒情

獨醉

元稹

一樹芳菲也當春漫隨車馬擁行塵桃花解笑鶯能語  
自醉自眠那藉人

劉兵曹贈酒

唐張籍

一餅顏色似秋泉開向新栽小竹前飲罷身中更無事  
移牀獨就夕陽眠

花下醉

唐  
李商隱

尋芳不覺醉流霞倚樹沈眠日已斜  
客散酒醒深夜後更持紅燭賞殘花

春夕酒醒

唐  
皮日休

四絃纔罷醉蠻奴醺醺餘香在翠爐  
夜半醒來紅蠟短一枝寒淚作珊瑚

自遣

唐  
陸龜蒙

醞得秋泉似玉容比於雲液更應濃  
思量北海徐劉輩

枉向人間號酒龍

和皮襲美徵友人酒

陸龜蒙

凍醪初漉嫩如春  
輕蟻漂漂雜藥塵  
得伴方平同一醉  
明朝應作蔡經身

和襲美醉中以一壺并一絕見寄次韻

陸龜蒙

酒痕衣上雜莓苔  
猶憶紅螺一兩杯  
正被遶籬荒菊笑  
日斜還有白衣來

禁直和人飲酒

唐鄭畋

卉醴院花物外香  
清醲標格勝椒漿  
我來尚有釣天會  
猶得金樽半日嘗

詠酒

唐汪遵

萬事銷沈向一杯  
竹門啞軋為風開  
秋宵睡足芭蕉雨  
又是江湖入夢來

對酒

唐韋莊

何用巖棲隱姓名  
一壺春酎可忘形  
伯倫若有長生術

直到如今醉未醒

和陳表用員外求酒

宋 徐鉉

暑天頻雨亦頻晴  
簾外閒雲重復輕  
珍重一壺酬絕唱  
向風遙想醉吟聲

次韻趙德麟雪中惜梅且餉柑酒

宋 蘇軾

蹀躞驕黃不受韉  
東風暗與色香歸  
偶逢白墮爭春酒  
遣入王孫玉笋飛

贈孫莘老

蘇軾

烏程霜稻襲人香  
釀作春風雲水光  
時復中之徐邈聖  
母多酌我次公狂

冬日田園雜興

宋

范成大

煮酒春前臘後蒸  
一年長饗甕頭清  
麈居何似山居樂  
秫米新來禁入城

正月五日以送伴借官侍宴集英殿口號

宋

楊萬里

千官拜舞仰虛皇奉瑤池萬壽觴殿裏雙傳送御酒  
檻前一曲繞虹梁

宮詞

宋  
花藥夫人

酒庫新修近水傍  
潑醅初熟五雲漿  
殿前供御頻宣索  
進入花間一陣香

飲歸

元  
方回

潑灩紅深百盞澆  
醉歸不覺路迢迢  
臨分情味慙慙甚  
暗遣人扶過畫橋

中山府

元 陳孚

馬上秋雲擁節旄  
霜花如雪點征袍  
要留醒眼看天地  
不向山中飲濁醪

吳中親舊遠寄新酒

明 高啓

雙壺遠寄碧香新  
酒內情多易醉人  
上國豈無千日釀  
獨憐此是故鄉春

子烜買紅酒

明 張以寧

吳江紅酒紅如霞  
憶著故園桃李花  
羊角山前幾迴醉



女須嗔汝未還家

內法酒出大官者嘗四叨燕賜及諸大璫所釀  
亦近之雖似清美但或甘或冽多未得平飲  
之令人熱及好渴不堪醉也

明  
王世貞

黃封銀甕出當筵側并須防執法前何似家園紅友在  
一甌相藉柳風眠

襄陵酒出平陽襄陵縣色黃白香釀而所致者

多過甘不堪醕獨趙兵巡齋兩醕味極殊絕  
累日不厭以無甘味故也

王世貞

涓然甘露布松梢似玉如飴味更饒尚有碧霄真沆瀣  
無將一滴貯天瓢

蒲州酒清冽芬旨與羊羔並而不羶遠出桑落  
襄陵之上特以遠故不易得

王世貞

屑瓊為麴露為漿超出人間色味香應從帝女傳遺法  
不向河東羨索郎

秋露白出山東藩司甘而醖色白性熱余絕不  
喜之臬司因為改造終不能佳也惟德府王  
親薛生者收蓮花露釀之清芬特甚第不可  
多得耳

王世貞

玉露凝雲在半空銀槽虛自滴秋紅薛家新樣蓮花色  
好把清樽傍碧筒

章丘酒去濟南不百里清味雋永自是名勝而  
人乃傳秋露何也謝少谿侍郎者佳

王世貞

玉缸春色暖融融一點清冷便不同肯向邯鄲鬪穠豔  
自誇林下謝家風

淮安酒有一種差佳曰苦蒿味近苦而冽世人  
重甘良可笑也

王世貞

漕河兩岸碧欄杆瀉出春缸琥珀寒任道儂家勝崖蜜  
爭如橄欖有回甘

蕩口酒范氏華氏以鶯肫蕩水釀絕如茱竹色

而清旨爽冽醕之涼風生齒咽間美而不醒  
南酒第一也余嘗過其地醉者兩日

王世貞

波如竹色酒如波勸客仍傾翡翠螺縱醉欲拋拋不得  
教人無奈憶時何

行抵平原而酒忽濁作此自嘲 王世貞

使君虛忝舊青州無那平原有督郵解使璽書今夜至  
不教封作醉鄉侯

王元美分守浙西書來謂烏程酒濁如涇水黑

若油也戲為解嘲

明

王叔承

試問烏程第一筍醉仙翻作酒家羞三千年上探星海  
未必黃河是濁流

荊州公餽酒

明

宋登春

菱葉青青水荇齊遶籬黃蝶菜苗肥夕陽誰送山人醉  
坐看兒童跨犢歸

其二

秋風嫋嫋熟黃梁池上鷺肥酒更香醉裏不妨學楚語  
竹枝歌好和漁郎

醉歸

明  
吳孺子

風磴雲梯手自扶飛花如意引歸途莫教水氣醒餘醉  
寧使兒童厭再沽

舟過陸州謝鄉人余五郎送酒

明  
王寅

新醪香豔石榴花贈得雙樽不用賒為謝客愁消得盡

殘年一路醉還家

山下買酒

明  
何其漁

隔浦漁家傍酒家  
漁罾掩暎酒帘斜  
探囊恰好供歸客

黃魚并杏花


釀酒

明  
梁小玉

麴部尚書譜不留  
椒花細雨冽香流  
釀王家法應如是  
新拜雲谿女醉侯

御定佩文齋詠物詩選卷二百四十三





總校官庶吉士臣侍

朝

校對官庶吉士臣嚴

福

膳錄監生臣繆

謨